


Ni Presidente Dieter F. Uchtdorf

Maikadua a Mammagbaga
iti Umuna a Panguluén



Kalpasan ti Ayat, Ania ti Sumaruno?

Insuronatayo ti ay-ayatentayo a propeta, ni Presidente Thomas S. Monson, a “ti ayat ti mismo a kaipapanan ti ebanghelio.”¹

Napateg unay ti ayat gapu ta inawagan daytoy ni Jesus iti “ti umuna ken naindaklan a bilin” ken kinunana a tunggal sabali pay a paset ti linteg dagiti balikas dagiti propeta ket agpannuray iti daytoy.²

Ti ayat ti kangrunaan a gandat para iti amin nga aramidentayo iti Simbaan. Nasken a ti tunggal programa, tunggal miting, tunggal aramid a pakaipasetantayo kas disipulo ni Jesucristo ket agtaud iti daytoy a kababalin—gapu ta no awan ti asi, “ti natarnaw nga ayat ni Cristo,”awan ti kaes-eskantayo.³

Apaman a maawatantayo daytoy iti panunot ken pusotayo, apaman nga ipeksatayo ti ayattayo para iti Dios ken para iti padatayo a tao—ania kalpasanna?

Umdas kadi ti rikna ti panangngaasi ken ayat para kadagiti dadduma? Ti kadi panangipeksatayo iti ayat para iti Dios ken iti padatayo a tao ket mangpakapnek iti obligasionantayo iti Dios?

Ti Panggarig maipapan ti Dua nga Annak a Lalaki

Iti templo ti Jerusalem, immasideg ken ni Jesus ti dua a panguluén a saserdote ken panglakayen dagiti Judio tapno mapagsaoda Isuna iti banag nga usarenda a maibusor Kenkuana. Nupay kasta, binaliwan ti Mangisalakán ti situasion kadakuada babaen ti panangisalayayna iti estoria.

“Maysa a tao ti addaan iti dua nga annak a lallaki,” inrugina. Immasideg ti ama iti umuna nga anak a lalaki ket imbagana kenkuana a mapan agtrabaho iti kaubasan. Ngem nagkedked ti anak a lalaki. Idi agangay “nagbabawi, ket napan.”

Kalpasanna napan ti ama iti maikadua nga anak ket imbagana kenkuana a mapan agtrabaho iti kaubasan. Impanamnana ti maikadua nga anak a lalaki a mapan, ngem saan pulos a napan.

Kalpasanna immasideg ti Mangisalakán kadagiti saserdote ken panglakayen ket nagsaludsod, “Asino kadagitoy dua nga annak a lallaki ti nangaramid iti pagayatan ti amana?”

Nasken nga akuenda a ti umuna nga anak a lalaki—ti nagkuna a saan a mapan ngem idi agangay nagbabawi ket napan nagtrabaho iti kaubasan.⁴

Inusar ti Mangisalakán daytoy nga estoria a pangyunay-unay iti napateg a pagbatayan—dagiti nagtungpal kadagiti bilin ti pudno nga agayat iti Dios.

Nalabit a daytoy ti gapu no apay a kiniddaw ni Jesus kadagiti tao a dumngeng ken sumurot kadagiti balikas dagiti Fariseo ken eskriba ngem saan a sumurot iti pagwadanda.⁵ Dagitoy mannursuro iti relihion ket saanda nga aramidén dagiti banag a kunada nga aramidenda. Pagay-ayatda a pagsasaritaan ti maipapan iti relihion, ngem dida ammo ti kaipapananna.

Dagiti Aramid ken ti Pannakaisalakantayo

Iti maysa kadagiti maudi nga adalen ni Jesus kadagiti ti disipulona, insaritana kadakuada maipapan ti maudi a Panangukom. Agsinanto dagiti nadangkes ken dagiti nalinteg. Tawidento dagiti nalinteg ti agnanayon a biag, maipanto dagiti nadangkes iti agnanayon a pannakadusa.

Ania ti pagdumaan dagiti dua a grupo?

Naisalakan dagiti nangipakita iti ayatda babaen ti aramid. Nakondena dagiti saan a nangaramid.⁶ Ti pudno a konbersion wenno pannakapasurot iti ebanghelio ni Jesucristo ken kadagiti ik-ikkan pateg ken pagbatayan ket maipakitanto babaen dagiti aramiditayo iti inaldaw a panagbiagtayo.

Iti udina, ti panangipekisa laeng iti ayat para iti Dios ken kadagiti padatayo a tao ket saan a mangpaikari kadatayo para iti pannakaitan-ok. Gapuna, kas iti insuro ni Jesus, “saan a tunggal maysa nga agkuna kaniak, Apo, Apo, sumrekto iti pagarian ti langit; ngem tinta mangaramid iti pagayatan ti Amak nga adda sadi langit.”⁷

Ania ti Sumaruno kalpasan ti Ayat?

Ti sungbat iti saludsod a “Kalpasan ti ayat, ania ti sumaruno?” ket mabalina a simple ken natarus. No pudno nga ay-ayatentayo ti Mangisalakan, itunostayo dagiti puspusotayo Kenkuana ket kalpasanna magnatayo iti dalan ti kinadisipulo. No ay-ayatentayo ti Dios, ikarigatantayo a tungpalen dagiti bilinna.⁸

No pudno nga ay-ayatentayo dagiti padatayo a tao, idiatayato ti bagbagitayo a tumulong “kadagiti napanglaw ken agkasapulan, dagiti masaksakit ken agsagsagaba.”⁹

Gapu ta isuda nga agaramid kadagitoy naayat nga aramid ti panangngaasi ken serbisio,¹⁰ isuda met laeng dagiti disipulo ni Jesucristo.

Daytoy ti sumangbay kalpasan ti ayat.

Daytoy ti pudno a kaipapanan ti ebanghelio ni Jesucristo.

DAGITI NAGADAWAN

1. Thomas S. Monson, “Love, the Essence of the Gospel,” *Liahona*, Mayo 2014, 91.
2. Kitaen iti Mateo 22:36–40.
3. Kitaen iti Moroni 7:46–47.
4. Kitaen iti Mateo 21:28–32.
5. Kitaen iti Mateo 23:3.
6. Kitaen iti Mateo 25:31–46.
7. Mateo 7:21.
8. Kitaen iti Juan 14:15.
9. Doktrina ken Katulagan 52:40.
10. Kitaen iti Mosiah 18:8–9.

PANANGISURO MANIPUD ITI DAYTOY A MENSAHE

Ilawlawag ni Presidente Uchtdorf a dagiti pudno a disipulo ni Jesucristo ket isu dagiti mangipakita iti ayatda para Kenkuana ken para kadagiti dadduma babaen kadagiti aramidda. Isuronatayo a “no pudno nga ay-ayatentayo ti Mangisalakan, itunostayo dagiti pusotayo Kenkuana ket kalpasanna magnatayo iti dalan ti kinadisipulo.” Saludsodentayo dagiti sursuruanyo no ania dagiti wagas a nakaparegtaan kadakuada ti ayat tapno magna iti dalan ti kinadisipulo. Mabalinyo met ti mangisalaysay kadagiti padasyo kadakuada. Mabalinyo nga awisen ida nga agkararag para iti adadu pay a panangngaasi ken pigsa nga agtignay nga addaan iti ayat.

AGTUTUBO

Panagtungpal kadagiti Bilin ken Panagayat kadagiti Dadduma

No panunotentayo maipapan ti ayat, masansan ti umuna a sumrek iti panunot ket dagiti sine maipapan ti romansa, tsokolate, ken sabsabong. Ngem ti ayat—*pudno nga ayat*—ket naun-uneg nga amang ken ad-adda pay a managayat ngem dayta. Nagbiag ni Jesucristo para kadatayo ken natay para kadatayo gapu ta ay-ayatennatayo. Kinapudnona, ti dua a naindaklan a bilin ket ti agayat iti Dios ken agayat iti tunggal maysa (kitaen Mateo 22:36–40). Ngem kasano a datayo ket *makaipakita* iti dadduma nga ay-ayatentayo ida?

Isalaysay ni Presidente Uchtdorf ti pangngarig maipapan ti dua nga anak a lallaki, maysa ti agtartrabaho para iti amana ken maysa ti saan. Ilawlawag ti Mangisalakan a ti laeng anak a lalaki a nagtungpal iti amana ti pudno a nagayat kenkuana. Kasta met a, no agtungpaltayo kadagiti bilin ti Dios, ipakitatayo nga ay-ayatentayo Isuna ken kayattayo ti agsubli Kenkuana.

Ngem kasano nga ipakitatayo ti ayattayo iti tunggal maysa? Ilawlawag met daytoy ni Presidente Uchtdorf: “No pudno nga ay-ayatentayo dagiti padatayo a tao, idiatatayo ti bagbagitayo a tumulong kadagiti ‘napanglaw ken agkasapulan, dagiti masaksakit ken

agsagsagaba.’ Gapu ta isuda a mangaramid kadagitoy naayat nga aramid ti panangngaasi ken serbisio, isuda met laeng dagiti disipulo ni Jesucristo.”

Isu a no iti sumuno a gundaway a makitayo ti naganak kadakayo, kabsat, wenno gayyem, panunotenyoy maipapan ti panagserbi kadakuada a mangipakita panangipategyo kadakuada. Saan laeng a daytoy ti mangparagsak kenka ken kadakuada, ngem mangparagsakto pay daytoy iti Amayo iti Langit.

ANNAK

Panangipakita iti Ayat

Isalaysay ni Jesus ti estoria maipapan iti maysa nga ama ken ti dua nga anakna a lallaki. Nagtrabaho ti ama iti kaubasan ket kiniddawna a tumulong ti dua nga anakna a lallaki. Kinuna ti umuna nga anak a lalaki a saan idi damo ngem idi agangay napan met la tumulong iti kaubasan. Kinuna ti maikadua nga anak a lalaki a mapan tumolong, ngem dina men inaramid. Insuro ni Jesus a ti umuna nga anak a lalaki ket nangipakita iti ad-adda nga ayat para iti amana babaen ti panagtungpal.

Yakem daytoy nga estoria! Kalpasanna isurat wenno idrowingyo ti tallo a banag a maaramidyo a mangipakita iti ayatyo iti Nailangitan nga Ama.



Pammati, Pamilia, Tulong

Maysa a Sagrado a Pagrebbengan ti Panagbalin a Nagannak

Nainkararagan nga adalenyo daytoy a material ken kalikagumanyo nga ammuen no ania ti ibinglayyo. Kasano a ti pannakaawat iti “Ti Kaamaan: Maysa a Waragawag iti Lubong” ket mangpadakkel iti pammatiyo iti Dios ken mangparabur kadagiti ay-aywananyo babaen ti visiting teaching? Para iti ad-adu pay nga impormasion, mapan iti reliefsociety.lds.org.

Impasdek ti Nailangitan nga Amatayo dagiti pamilia a makatulong kadatayo a mangisuro kadagiti umno a pagbatayan iti naayat nga aglaw-law. Kinuna ni Presidente Thomas S. Monson: “Ikkam ti anakmo iti maysa a pammadayaw ken maysa nga arakup; kunam, ‘Ay-ayatenka’ unay; kanayon a yebkasmu ti panagya-manmo. Dimo pulos bay-an nga agbalin a natapatteg ti masolbar a problema ngem iti tao a maayat.”¹

Ni Susan W. Tanner, sigud a Young Women general president, insurona: “Impagwadan ti Amatayo iti Langit ti pagtuladan a nasken a surotentayo. Ay-ayatennatayo, isursuronatayo, naanus kadatayo, ket intalekna kadatayo ti kinawaya a panagpili. . . . No dadduma ti disiplinana, a kayatna a sawen ti ‘mangisuro,’ ket mapagbiddutan iti panagdillaw. Dagiti annak—kasta met ti amin a tao ania man ti edadda—ket mapasayaatda ti ugalida manipud iti ayat ken panangparegta a nagnangruna ngem iti panagpabasol.”²

“No sipupudnotayo a maaddaan iti panagkararag a sangapamiliaan, panagadal iti nasantuan a kasuratan, family home evening, pammendision ti priesthood, ken panagtulnog

iti aldaw ti Sabbath,” kinuna ni Elder Quentin L. Cook ti Korum dagiti Sangapulo-ket-dua nga Apostol, “dagiti annaktayo ket . . . maisaganadanto para iti agnanayon a pagtaengan iti langit, ania man ti mapasamak kadakuada iti narikut a lubong.”³

Dagiti Mainayon a Nasantuan a Kasuratan

1 Nephi 8:37; 3 Nephi 22:13; Doktrin ken Katulagan 93:40; 121:41

Dagiti Estoria ti Tattao a Sibibiag Pay

“Basbasaek ti pagiwarnak idi maysa kadagiti ubbing nga appokok a lallaki ti nakitugaw kaniak,” kinuna ni Elder Robert D. Hales ti Korum dagiti Sangapulo-ket-dua nga Apostol. “Bayat ti panagbasbasak, naragsakanak a dumngeng iti nasam-it a timekna nga agsarsarita a makigid-dan kaniak. Nasdaawak idi, kalpaskan ti sumagmamano a kanito, insadagna ti bagina kaniak ken ti pagiwarnak. Inaprosanna ti rupak ken indeppelna ti agongna iti agongko, insaona ti, ‘Lelong! Dengdengennak kadi?’

“ . . . Ti kaadda *idiay* ket kayatna a sawen a pannakaawat iti puspuso

dagiti agtutubotayo ken panakipulapol kadakuada. Ket ti pannakipulapol kadakuada ket kayatna a sawen a saan laeng a pannakisarsarita kadakuada ngem panangaramid pay kadagiti banag a kadua ida. . . .

“Nasken a planuentayo ken ikkan iti gundaway dagiti kanito iti panangisuro. . . .

“ . . . Iti nabaybayag a panagbiagko, ad-adda met a mabigbigko a dagiti gundaway a panangisuro iti kinaagtutubok, nagnangruna kadagiti insuro dagiti nagannak kaniak, ken nagsukog iti biagko ken namangbalin kaniak no asinoak.”⁴

DAGITI NAGADAWAN

1. Thomas S. Monson, “Love at Home—Counsel from Our Prophet,” *Liahona*, Ago. 2011, 4.
2. Susan W. Tanner, “Did I Tell You . . . ?” *Liahona*, Mayo 2003, 74.
3. Quentin L. Cook, “The Lord Is My Light,” *Liahona*, Mayo 2015, 64.
4. Robert D. Hales, “Our Duty to God: The Mission of Parents and Leaders to the Rising Generation,” *Liahona*, Mayo 2010, 96, 95.

Ibilang Daytoy

Apay a kasayaatan a maisuro ti ebanghelio iti pagsasao ken pagwadan ti ayat?